



**JUMHURIYADDA FEDERAALKA
SOOMAALIYA**

GOLAHA SHACABKA

QARAAR KU SAABSAN

GURMADKA DEGDEG AH EE ABAARAHAA

Muqdisho, 18^{ka} Maarsø 2017

A handwritten signature in black ink, likely belonging to the President of Somalia, is located in the bottom right corner of the document.

GOLAHADHKA SOOMAALIYA

Markuu fiiro gaar ah u yeeshay: in Qur'aanka Kariimka iyo Sunnada Rasuulkeena Suuban (csws) iyo ilaalinta Maqaasiidda Sare Shareecada iyo cadaaladda bukshadu yihiin Mada'a aasaasiga u ah Dastuurka Jumhuuriyadda Federaalka si waafaqsan Qodobkiisa 3-aad

Markuu Arkay: Qodobka 10-aad Faqradda (1) ee Dastuurka Jamhuuriyadda Fedaraalka Soomaaliya oo qirayo in Karaamada aadanuhu tahay deeq Allahu swt ku mannaystay qof kasta oo Banii'aadan ah, xuquuqda aadanuhuna ay deeqdaas kasoo dhalatay.

Asaga oo xog ogaal u ah: in Qodobada 13^{-aad} iyo 15^{-aad} ee Dastuurkeena uu qof kasta siinayo xaqa nolosha, xoriyadda shaqsiyadeed iyo nabdgalyeda qofnimadiisa. Sidoo kale ugu xog ogaalsan in Cahdiga Qaruumaha Midoobay ee Xuquuqda Aadanuhu uu qofkasta oo banii-aadam ah siinayo isla xuquuqdan kor ku xusan ee dastuurkeena, saa daraadeedna xuquudaas yihiin xuquuq Alla-ku- siyeen ah oo banii aadamka addunka isku dhaqan-garto iskuna tixgeliyo;

Fiiro u yeeshay: in nabad la'aan iyo amni la'aan aanay suurtagal ahayn in la gaaro hormar dhaqaale iyo horumarinta iyo taakulaynta arrimaha bulshada toona;

Asaga oo ka welwelsan: xaaladaha ka dhashay jiilaalkan dheeraaday oo durba sababay dhimasho dad iyo duunyoba leh, kana murugeysan xaladda sii xumaanaysa ee abaarta ku sii fidaysa Dalka, taas oo iyadana dhalisay barkacayaal boqolaal kun qof abaarikeenti ah, oo u baahan in si degdeg ah loola gurmado Kaalmo Bani'adminimo heer Qaran iyo heer Caalami ahba leh lala gaaro dadka abaaratu tabaaleysay si halista naftooda iyo noloshooda ku sugar tahay looga badbaadsho;

Fiiro gaar ah u yeeshay: Abaabulka iyo jihaynta ay muujisay Dawladda Federaalka ayadoo kaashanayo Dawlado-Goboleedyada Federaalka iyo qaylodhaaminta ay u dirtay shacbiga Soomaaliyeed iyo beesha caalamka ugana baaqday in wadajir loogu gurmado ka hortagga aafioyinka abaarta dalka ka jirta;

Hadaba Golaha Shacabka Soomaaliya, Asaga oo Qaddariyey: Baaqii saamaynta abaarat dalka haysa, oo ku jiray Hadljeedinta Madaxweynaha Jumhuuriyadda Federaalka Soomaaliya iyo hadaljeedintii Ra'iisul Wasaaraha Xukuumadda Federaalka ka jeediyeen Golaha Shacabka hortiisa maalinti arbacada 1^{-da} Maars 2017:

WUXUU GO'AAMIYEY QODOBBADA SOO SOCDA

Qodobka 1-aad:

Goluhu wuxuu u baaqaya dhammaana Hay'addaha Dawladda Fadaraalka iyo Hay'addaha Dawlado-Goboleedyada xubno ka ah Federaalka, shacbiga Soomaaliyeed meel kasta oo ay joogaan, Ogaalleyda Diinta, Muwadiniinta Ganacsatada iyo Ururraadda Bulshadda in ay si wadajira ah ugu guntaddaan isuna abaabulaan sidii ay gacan uga geysan lahaayeen una kaalmeyn lahaayeen walaalahooda jiilaalka oo dheeraaday aafeeyey iyo abaartan sii baaheysana kusii habsanayso.

Qodobka 2-aad:

Waxuu dhammaan Wasaraddaha iyo Hay'adaha Dawladda Fadaraalka iyo Dhammaan Maamullada Dawlado-Goboleedyada Dalka ku dhiirigelinaya in ay abuuraan jawi fududeeya gaarsiinta alaabada kaalmo-aadaneedka ah ee loo wado taakulaynta dadka u baahan iyo in ay la yeeshaan wada shaqeyn dhaw Hay'adaha sida kaalmo-adamiyeedka kuna korjogteeyaan in xilgudashadoodu u fulinayaan si waafaqsan shuruucda dalka iyo mabadii'adda cahdiyada Caalamiga ah ee dadweynaha adduunka wada aqoonsan yahay.

Qodobka 3-aad:


1. Waxaa Dawladda iyo dhammaan Haydaha Dawladda Fadaraalka iyo dhammaan Haya'adaha Dawlado-Gobleedyadda Dalka la faraya in ay canshuur-dhaaf u sameeyaan alaabada loo keeno gargaarka taakulaynta aadanaha iyo ka hortagga afooyinka abaarta.
2. Waxaa kaloo hay'daha kor ku xusan la faraya in shuruucda, xeer-nidaamiyada iyo habraacyada kale ee jira la laalo hadii ay wax u dhimayaan habsami u socodka hawlahaa gaarsiinta taakulaynta ama shaqadda haya'daha Gargaarka ku hawlan, ama isu socodka dadka ama gaarsiinta alaabta gargaarka, lagana ilaaliyo wixii carqlaldo ama daahid keeni kara ilaa iyo intii Abaartan laga baxayo.

Qodobka 4-aad:

In Xukuumaddu Golaha Shacabka Soomaaliya u soo diyaariso Nidaam-Siyaasadeed (Policy) leh Istaratijiyad qarameed looga hortagayo Abaaraha iyo Aafooyinka dabiiciga ah.

Qodobka 5-aad:

In la dhiso Guddi Golaha Shacabka Soomaaliya oo korjogteeyaa gurmadka gargaarka abaaraha ay Xukuumadda iyo Guddiga Gurmadka Abaaraha ay fulinayaan.



Qodobka 6-aad:

In Ciidamada Qalabka Sida ee Soomaaliyeed iyo Ciidamada AMISOM ay si buuxda ugu qeybgalaan Gurmadka Abaaraha iyo fududeynta gaarsiinta deeqaha gurmadka ah ee loo sido Shacbiga tabaaleysan.

Qodobka 7-aad:

Si loo sugo daahfurnaanta Maamulka Gurmadka Abaaraha, Guddiga Abaaruhu waa in uu shabakada “Website” ku soo bandhigaan dhammaan dhaqaalaha iyo agabka soo gaaray, cidda ku deeqday iyo halka ay ku bixiyen si bulshada soomaaliyeed iyo deeqbixiyeyaasha gudaha iyo dibeddaba loogu hubaalceliyo in deequhu gaareen dadka loogu talagalay.

Qodobka 8-aad:

In Guddiga Qaranka ee Gurmadka Abaaraha uu ugu yaraan bishiiba hal mar warbixin ku saabsan howlaha Guddiga hadba halka ay marayaan u horkeeno Golaha Shacabka Soomaaliyeed.

Qodobka 9-aad:

Dhammaan hay'adaha Qaranka heer Federaal iyo heer Dawlado Goboleedyo waxaa la faraya in ay u hoggaansamaan qaraarkan hirgelintiisuna hubiyaan.

Qodobka 10-aad

Qaraarkani wuxuuna hirgelayaa markuu Madaxweynaha Jumhuuriyadda Federaalka Soomaaliya saxiixo oo ku meelmariyo Xeer Madaxweyne, laguna soo saaro Faafinta Rasmiga ah ee Jumhuuriyadda.

M.ne Muxammad Sh. Cusmaan "Jawaad" Guddoomiyaha Golaha Shacabka Soomaaliya

